



CONVENIO DE COLABORACIÓN ENTRE A FUNDACIÓN CIDADE DA CULTURA DE GALICIA E A AXENCIA PARA A MODERNIZACIÓN TECNOLÓXICA DE GALICIA PARA A POSTA A DISPOSICIÓN DE TERCEIRAS EMPRESAS DE ESPAZO COA FINALIDADE DE FACILITAR A COORDINACIÓN DE PROXECTOS ESTRATÉXICOS DA AXENCIA PARA A MODERNIZACIÓN TECNOLÓXICA DE GALICIA.

Memoria xustificativa e económica

1. ANTECEDENTES

A Fundación Cidade da Cultura de Galicia é unha fundación do sector público galego, sen ánimo de lucro, declarada de interese cultural pola orde da Consellería da Presidencia e Administración Pública do 11 de xaneiro de 2000, e cuxo obxecto, recollido no artigo seis dos seus Estatutos, é “a creación, explotación e promoción de areas ou centros de conservación, produción, exhibición y consumo cultural, comunicativo e tecnolóxico que constitúa un espazo multifuncional, multidisciplinar e aglutinador propicio a interacción cultural”.

Conforme aos seus estatutos, para a consecución dos obxectivos mencionados no artigo anterior, a fundación pode realizar as seguintes actividades:

- a) As necesarias para converterse nun actor clave na difusión cultural, que serva de punto de encontro entre os cidadáns e a cultura.*
- b) As que contribúan a desempeñar un papel destacado no proceso de enriquecemento/aprendizaxe cultural da cidadanía, con especial énfase na adopción e uso das novas tecnoloxías. [...]*
- e) As que fomenten a interrelación e os proxectos en conxunto entre axentes de distintos ámbitos das industrias culturais e creativas, con especial énfase na cooperación interrexional e a colaboración pública e privada. [...]*
- g) As que impulsen o Emprendemento empresarial no ámbito das industrias culturais e creativas, con especial énfase en proxectos que favorezan a innovación, tanto tecnolóxica como non tecnolóxica, e a súa transferencia aos sectores máis maduros do tecido produtivo, servindo como plataforma de desenvolvemento e promoción da marca país Galicia.*
- h) As actividades e accións que contribúan a converter á Cidade da Cultura de Galicia nun proxecto economicamente sostible e socialmente rendible, incorporando novos socios estratéxicos, tanto públicos como privados, e diversificando as fontes de financiamento para acadar a sustentabilidade do proxecto con independencia do ciclo económico.”*

A Fundación Cidade da Cultura de Galicia ostenta a titularidade da "Cidade da Cultura de Galicia"(CdC), que inclúe diversas edificacións, infraestruturas, viais, áreas de lecer e zonas verdes, representando en conxunto un proxecto estratéxico de gran importancia dentro da vida cultural da Comunidade Autónoma de Galicia. Neste sentido a Fundación Cidade da Cultura é propietaria do edificio Centro de Innovación Cultural e de Modernización Tecnolóxica de Galicia (CINC), no que se ubica o “Espazo Empresas”, que alberga a distintas empresas que na actualidade presta servizos sobre proxectos estratéxicos da Axencia que requiren coordinación entre diferentes empresas ou coordinación coa AMTEGA.





Pola súa parte, a Axencia para a Modernización Tecnolóxica de Galicia (AMTEGA) creouse mediante o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos. Este decreto regula tanto as súas competencias e funcións como a súa organización e estrutura, o réxime do seu persoal, o réxime económico-financeiro e patrimonial, así como os principios que a orientarán na súa actuación.

A AMTEGA é unha axencia pública autonómica que ten como obxectivos básicos a “definición, o desenvolvemento e a execución dos instrumentos da política da Xunta de Galicia no eido das tecnoloxías da información e a comunicación e a innovación e o desenvolvemento tecnolóxico”.

A AMTEGA ven de publicar o contrato de xestión que establece os compromisos que ten que cumprir a Amtega no ámbito de actuación ao que estende a súa actividade en virtude das competencias atribuídas polo seu Decreto de creación. O contido deste contrato de xestión aprobouse, en termos de proposta, polo Consello Reitor da Amtega por acordo de data 21 de marzo de 2018 e, con carácter definitivo, polo Consello da Xunta de Galicia, na sesión celebrada o día 5 de abril de 2018. O citado contrato de xestión entrou en vigor ao día seguinte ao da súa aprobación polo Consello da Xunta.

Este sería o 2º contrato plurianual de xestión desta axencia pública autonómica coa finalidade de establecer o marco de actuación da Axencia para a Modernización Tecnolóxica de Galicia para os vindeiros catro anos, aliñado coa Axenda Dixital de Galicia 2020 e adaptado ao novo marco establecido polo Programa Operativo FEDER 2014 - 2020.

O Goberno galego a través da Axenda Dixital de Galicia 2020, liderada pola Amtega e aprobada no Consello da Xunta de Galicia o 30 de abril de 2015, ten o obxectivo de impulsar un modelo de crecemento baseado na economía dixital, que contribúa a dar resposta a desafíos aos que se enfronta Galicia en todas as áreas de desenvolvemento. A Axenda Dixital de Galicia 2020 establece as seguintes cinco liñas estratéxicas que se reforzan mutuamente:

- * Valorización da Administración, avanzando cara a unha Administración dixital innovadora que aprende e se conecta á realidade da sociedade para responder e adiantarse ás necesidades e expectativas da cidadanía e as empresas.

- * Énfase na vida dixital, aproveitando o potencial das TIC para converter a Galicia nun lugar de progreso social avanzado e onde as persoas poidan levar unha vida autónoma e participar activamente na sociedade.

- * Aceleración da Economía Dixital, promovendo o liderado de empresas que a través da incorporación das TIC, tanto nos procesos internos como de negocio, garantan a creación e absorción de talento e innovación para xerar novas oportunidades e promover así a atracción e o crecemento económico na Comunidade.

- * Estímulo ao crecemento do Sector TIC, impulsando a innovación tecnolóxica, a competitividade e a xeración de emprego no ecosistema dixital que contribúan a posicionar ao sector tecnolóxico como un dos sectores de referencia de Galicia.

- * Articulación dixital do territorio, favorecendo non só a conectividade TIC necesaria para garantir a vertebración dixital do territorio de xeito seguro e sostible, senón tamén para coñecer información que permita, en caso de ser necesario, actuar de xeito intelixente.



Para a satisfacción dos obxectivos estratéxicos da AMTEGA, e aos efectos de facilitar a debida coordinación coas empresas adxudicatarias dos seus contratos de servizos, a Fundación, a instancias da AMTEGA, ofrece a posibilidade de que tales empresas que presten servizos sobre proxectos estratéxicos da Axencia que requiren coordinación entre diferentes empresas ou coordinación coa AMTEGA, poidan ocupar espazos a cambio dun prezo en instalacións próximas á sede da AMTEGA. Neste sentido, a Fundación Cidade da Cultura de Galicia e a Axencia para a Modernización Tecnolóxica de Galicia asinaron 22 de outubro de 2013, un primeiro convenio co fin de poñer a disposición de terceiras empresas espazos libres situados na planta baixa do Edificio CINC, aos efectos de facilitar a coordinación de proxectos estratéxicos da Axencia para a Modernización Tecnolóxica de Galicia con ditas empresas.

O 22 de outubro de 2018, o convenio citado no punto anterior deixa de producir efectos, polo que procede a sinatura dun novo convenio que garanta a posta a disposición a favor de terceiras empresas espazos libres situados na planta baixa do Edificio CINC, aos efectos de facilitar a coordinación de proxectos estratéxicos da AMTEGA con ditas empresas.

2. NECESIDADE E IDONEIDADE

Como se indicou no punto anterior, o 22 de outubro de 2018, o convenio anterior deixou de producir efectos, polo que procede a sinatura dun novo convenio que garanta a posta a disposición a favor de terceiras empresas espazos libres situados na planta baixa do Edificio CINC, aos efectos de facilitar a coordinación de proxectos estratéxicos da AMTEGA con ditas empresas.

3. OBXECTO E FINALIDADE DO CONVENIO

3.1. Ó obxecto do presente convenio é definir a colaboración entre a Fundación Cidade da Cultura de Galicia, e a AMTEGA, co fin de poñer a disposición de terceiras empresas os seguintes espazos libres situados na planta baixa do Edificio CINC, aos efectos de facilitar a coordinación de proxectos estratéxicos da AMTEGA:

- Local nº 105. Superficie útil: 206,95 m2
- Local nº 106. Superficie útil: 13,28 m2
- Local nº 108. Superficie útil: 7,10 m2
- Local nº 126. Superficie útil: 174,38 m2
- Local nº 128. Superficie útil: 123,38 m2
- Local nº 212. Superficie útil: 131,23 m2

Os espazos dividiranse en “unidades de espazo” susceptibles de cesión independente que constarán dos seguintes elementos:

- 1 mesa de traballo
- 1 cadeira de oficina
- 1 caixoneira móbil

3.2. Sen prexuízo do disposto no punto anterior, as partes conveñen a posibilidade de ampliación da superficie a disposición de terceiras empresas coa incorporación dos espazos denominados “Pool” da planta baixa que actualmente están cedidos á AMTEGA para usos propios da Axencia. En calquera caso, AMTEGA poderá revocar de forma



unilateral a cesión deste espazo a terceiras empresas, sempre que precise este espazo para funcionamento propio da entidade e o notifique á Fundación con polo menos dous meses de antelación á data de uso efectivo dos espazos, a fin de permitir oportuna comunicación de rescisión de contratos ás empresas afectadas.

3.3. A Fundación, de ser o caso, poderá incorporar novos espazos á oferta prevista no punto 1.1 sempre que ditos espazos estean dispoñibles e non permanezan vinculados a outras actuacións propias da súa actividade fundacional, estatutaria e cultural, e sempre mediando oportuna autorización do Padroado da mesma. En calquera caso, a Fundación poderá revocar de forma unilateral a cesión destes espazos a terceiras empresas, sempre que precise este espazo para actividades fundacionais, segundo o previsto nos estatutos, e o notifique á AMTEGA con polo menos dous meses de antelación á data de uso efectivo dos espazos.

4. DOTACIÓN ECONÓMICA

O presente convenio de colaboración non xera ningunha obriga económica entre as partes.

Cada unha das partes financiarán as actuacións e obrigas derivadas deste convenio, conforme aos seus orzamentos.

5. OBRIGAS DAS PARTES

- **Obrigas da Fundación.**

A Fundación, en base ás necesidades de ubicación das empresas previamente manifestadas pola Axencia nos locais sinalados na cláusula primeira, consensuará con estas o número de espazos susceptibles de cesión de uso.

A Fundación procederá ao alugueiro dos espazos coas empresas previamente sinaladas pola AMTEGA, concretando o número de “unidades de espazo” obxecto de cesión de uso.

O prezo, co IVE engadido, por cada “unidade de espazo”, será de **cento dez euros ao mes (110,00 €/mes)**.

O prezo sinalado inclúe a participación do Cesionario nos gastos comúns da propia Fundación relativos á subministro de enerxía eléctrica, gas e gasóleo, auga, seguridade, mantemento xeral e limpeza.

Exclúense do prezo, e serán de conta do Cesionario, entre outros, os gastos de telefonía móbil, licenzas de software, gastos de material de oficina e equipamento, contribucións administrativas e impostos e licenzas derivados da realización da súa actividade, gastos de transporte e mensaxería.

Corresponde á Fundación a formalización do correspondente contrato, sobre a base do modelo recollido no Anexo I do presente convenio de colaboración.

- **Obrigas da AMTEGA**

AMTEGA se obriga a:





1.- Informar ás empresas adxudicatarias das licitacións convocadas pola Axencia da posibilidade de formalizar o citado cesión de uso de espazos coa Fundación sempre que as empresas o precisasen.

2.- Comunicar á Fundación as concretas empresas adxudicatarias, con carácter previo á súa posible ubicación nas dependencias obxecto do presente convenio de colaboración, ou de cara á posible resolución do contrato existente. A AMTEGA dará traslado do número de expediente e obxecto do que a terceira empresa resulta adxudicataria, así como data prevista de finalización do contrato.

3.- A Axencia se compromete a poñer a disposición en tales espazos dun mobiliario básico (mesas, cadeiras, caixoneiras e armarios relacionados no Anexo II) a situar nas dependencias obxecto do presente convenio de colaboración, así como o mantemento ou substitución do mobiliario posto a disposición, cando o mesmo resulte dano e xa non sexa adecuado ao uso para o que foron adquiridos.

4.- Solicitar autorización expresa da Fundación cando se prevea a necesidade de ampliación de mobiliario ou espazo para poñer a disposición das terceiras empresas.

En calquera caso, a AMTEGA non poderá dispoñer libremente dos espazos e autorizar o uso dos mesmos sen mediar oportuna autorización da Fundación, previa formalización de contrato oportuno.

6. PRAZO DE EXECUCIÓN

O prazo de duración do presente convenio estará vinculado á vixencia do segundo contrato plurianual de xestión polo que se establecen os compromisos que ten que cumprir a Amtega no ámbito de actuación ao que estende a súa actividade en virtude das competencias atribuídas polo seu Decreto de creación, isto é, ata o 31 de decembro de 2021.

Chegado o prazo máximo de duración indicado no parágrafo inmediatamente anterior, o convenio só será prorrogable sempre que, as dúas partes manifesten de mutuo acordo, con dous meses de antelación á expiración do convenio, a súa aceptación expresa á prórroga.

A duración dos diferentes contratos asinados con terceiros en virtude do presente convenio ou das súas das súas prórrogas non estará afectada pola vixencia do presente Convenio de Colaboración, todo iso sen prexuízo de que a extinción da duración de dito Convenio poida erixirse como causa, entre outras, para que a Fundación, chegado o vencemento anual, non prorrogue ditos contratos.

7. NATUREZA XURÍDICA DO CONVENIO

O presente convenio ten natureza administrativa e como tal se atopa excluído do ámbito de aplicación da Lei de Contratos del Sector Público. As cuestións litixiosas xurdidas sobre a interpretación, execución, modificación, resolución e efectos que puidesen derivarse da aplicación do presente convenio deberán solucionarse de mutuo acordo das partes no seo da Comisión de Seguimento constituída. Se non resultase posible alcanzar o devandito acordo, tales cuestións serán resoltas de acordo co establecido para os conflitos de atribucións na Lei 16/2010, de 17 de setembro, de Organización e Funcionamento da Administración Xeral e do sector público.





**XUNTA
DE GALICIA**

Fundación Cidade da Cultura de Galicia
Edificio CINC (3º andar), Monte Gaiás
15707, Santiago de Compostela
T.: (+34) 881 997 564, F.: (+34) 881 997 577
cidade.cultura@xunta.gal
www.cidadedacultura.gal



**FUNDACIÓN
CIDADE
DA CULTURA
DE GALICIA**

galicia

8. PUBLICIDADE

Este convenio incluírase no Rexistro de convenios da Xunta de Galicia a que se refire o Decreto 126/2006, de 20 de xullo, polo que se regula o Rexistro de Convenios da Xunta de Galicia.

En Santiago de Compostela a

Ana Isabel Vázquez Reboredo
Directora Xerente
Fundación Cidade da Cultura de Galicia



Xacobeo 2021

